

Timersorneq timigissarnerlu pillugit Inatsisartut inatsisaat nr. 15, 6. juni 2016-imeersoq

Kapitali 1

Atuuffia nassuaatillu

§ 1. Inatsit timersornermut tunngasunut atorneqarpoq, ataasiakkaallu peqqissuunerat, atugarissaarnerat aamma timikkut, tarnikkut inuuniarnikkullu ineriaartornerisa unammillersinnaanerisalu nukittorsarneqarnissaat siunertaralugu timersornermik siuarsaassaaq, tassunga ilanngullugu unammilluni timersornermik timigissarnermillu siuarsaassaaq.

§ 2. Inatsimmi matumani timersorneq tassaavoq timigissarniarluni aamma peqqissarniarluni timi atorlugu sammisaqarneq.

Imm. 2. Inatsimmi matumani timigissarneq tassaavoq kaloriat timimi uunneqartillugit imaluunniit inuit ataasiakkaat timikkut atugarissaarnerat peqqinnerallu nukittorsarniarlugu timi atorlugu sammisaqarnerit.

Imm. 3. Inatsimmi matumani sunngiffimmi peqqissarneq tassaavoq tarnikkut, sianissutsikkut timikkullu sammisaqartarneq pilerseqqinniarlugu.

Imm. 4. Inatsimmi matumani unammilluni timersorneq tassaavoq timersornerup ilaa, aalajangersimasunik maleruagassaqarluni ingerlanneqartartoq, taakkunanilu unammineq.

Kapitali 2

Ernumanngitsumik, isumannaatsumik minguitsumillu timersorneq timigissarnerlu

§ 3. Timersornermi kattuffit, timersoqatigiiffit aamma timersortartut klubbiisa kiisalu timigissartarfiit allallu ingerlataqarfiit timersornermik imaluunniit timigissarnermik sammisaqarnissamik neqerooruteqartartut imaluunniit taakkununnga eqqaanartunik sammisaqartitsut timersornerup timigissarnerullu ernumanngitsumik isumannaatsumillu toqqammaveqarluni ingerlanneqarnera isumagissavaat.

Imm. 2. Ernumanaanngitsumik isumannaatsumillu toqqammaveqarluni timersornermi timigissarnermilu tunngavigneqarpoq ilaatigut imm. 1-im i taaneqartut kattuffit suliffeqarfiillu:

- 1) meeqqanik pinerliisimannginnermik uppermarsaammik pissarsinissamut pisussaaffik pillugu Inatsisartut inatsisaat naapertorlugu meeqqanik pinerliisimannginnermik uppermarsatinik piumasaqaateqartussaatitaaneq pillugu maleruagassat malinneqarnissaat taakkulu pillugit ilisimatitsinissaat,
- 2) eqaarsaarutit periutsillu isumannaatsut atorneqarnerisigut atortut naammaginartut atorlugit timersornerup timigissarnerullu ingerlanneqarnera qulakkiissavaat, aamma
- 3) timersortoq timigissartorlu ajoquusersimasoq pisariaqartumik ikiorserneqarnissaa aamma katsorsartinnissaa sungiusarteqqinnissaalu siunertaralugu tapersorsorneqarnissaa qulakkiissavaat.

Imm. 3. Timersorneq timigissarnerlu pillugit toqqammaviiit ernumananngitsut isumannaatsullu pillugit maleruagassanik Naalakkersuisut aalajangersaasinnaapput.

§ 4. Timersornermi kattuffiit, timersoqatigiiffiit aamma timersortartut klubbiisa kiisalu timigissartarfuit allallu ingerlataqarfuit timersornermik imaluunniit timigissarnermik sammisaqarnissamik neqerooruteqartartut imaluunniit taakkununnga eqqaanartunik sammisaqartitsisut timersornerup timigissarnerullu atortussiat inerteqqutaasut atornagit aamma periutsit inerteqqutaasut atornagit ingerlannissa aamma nakorsaatinik pissassaatitut atorneqartartunik atuinnginnissaq pillugu maleruagassat Nakorsaatit Pissassaatitut Atorneqartarnerinut Kalaallit Nunaanni Akiuisunit aalajangersarneqartut malinneqarnissaat atortinnejarnissaallu isumagissuaat.

§ 5. Timersornermi kattuffiit, timersoqatigiiffiit aamma timersortartut klubbiisa timersortut imaluunniit timersortunik ikorfartuisut timersorluni unamminernik allanngortiteriniarnerni peqataannginnissaat isumagissuaat.

Imm. 2. Timersornermi unamminernik allanngortiteriniarnerup pitsaaliornissaa akiuiniarnerlu pillugit maleruagassanik Naalakkersuisut aalajangersaasinnaapput, tassunga ilanngullugit timersorluni unamminernik allanngortiteriniarnerup pitsaaliornissaa akiuiniarnerlu pillugit ataqtigissaarinermut allattoqarfip inissinneqarnera pillugu.

§ 6. Qaffasissumik timersorluni unamminermut atatillugu akiliilluni peqquserlutsitsinissaq imaluunniit akilerneqarluni peqquserluuteqarnissaq inerteqqutaavoq. Qaffasissumik timersorneq tassaavoq nuna tamakkerlugu, Kalaallit Nunaanni pissartangorniulluni, nunani tamalaani pissartangorniulluni unamminerit aamma timersortartut immikut piginnaanillit nunani tamalaani unamminerat.

Imm. 2. Inatsimmi matumani akiliilluni peqquserlunneq tassaavoq pissuseq piaaraluni akuerisaanngitsumik

- 1) imm. 1-mi taaneqartunut timersorluni unamminermut atatillugu peqataasumut imaluunniit suliaqarluni isumaginnittumut tunissuteqarneq, tunissuteqarnissamut neriorsuineq neqerooruteqarnerluunniit imaluunniit timersorluni unamminermut sunniuteqarsinnaasumik pineqartup iliuuseqarnissaanut imaluunniit pinngitsoortinnissaanut allamut iluaqusiiniarneq, imaluunniit
- 2) imm. 1-mi taaneqartunut timersorluni unamminermut atatillugu peqataasumut imaluunniit suliaqarluni isumaginnittumut tunissummik tigusaqarneq, piumasaqarneq imaluunniit timersorluni unamminermut sunniuteqarsinnaasumik allamut iluaqutaasumik iliuuseqarneq imaluunniit pinngitsoortitsineq.

Kapitali 3

Pisortani ogartussat akisussaaffiinik suliassanillu agguaaneq

§ 7. Naalakkersuisut aamma communalbestyrelsi timersornermi kattuffiit suleqatigalugit inuiaqatigiinni immikkoortuni tamani timersornerup timigissarnerullu tapersorsorneqarnera

qulakkiissaavaat, tassunga ilanngullugit suli atualinngitsuni aamma atuarfinni, ilinniarfeqarfinni, sunngiffimmi neqeroorutini, suliffeqarfimmi aamma peqqinnissaqarfimmi inunnillu isumaginnittoqarfinni.

§ 8. Naalakkersuisut aamma kommunalbestyrelsi timersornermi kattuffiit suleqatigalugit timersorneq timigissarnerlu nunami tamarmi kikkunnut tamanut ammanera qulakkiissaavaat, tassunga ilanngullugit immikkut pisariaqartitsisunut siunnerfeqartumik suliniuitit tapersorsornerisigut aamma peqataanissamut aningaasaqarnikkut aporfiusut annikillisinneqarnissaannut suliniuteqarnikkut.

Imm. 2. Uku immikkut isiginiarneqarlutillu salliu tinneqassapput:

- 1) Meeqqat inuu suttullu.
- 2) Utoqqaat.
- 3) Inuit timimikkut susinnaanermikkut akornuteqartut.
- 4) Inuit immikkut atugarliortut.

Imm. 3. Timersornerup timigissarnerullu tamanut ammasunera pillugu maleruagassanik Naalakkersuisut aalajangersaasinnaapput, tassunga ilanngullugit immikkut pisariaaqartitsisunut siunnerfeqartunik immikkut suliniuitit pillugit aamma aningaasaqarnikkut aporfiusut annikillisinneqarnissaannut suliniuteqarnerit pillugit.

§ 9. Naalakkersuisut aamma kommunalbestyrelsi timersornermi kattuffiit suleqatigalugit timersornermut timigissarnermullu tunngasuni kajumissuseqarluni suliaqarnermut kajumissaaralutillu toqqammavinnut pitsasunik pilersitsillutillu tapersersuissapput.

Imm. 2. Kajumissuseqarluni suliaqarneq pillugu maleruagassanik Naalakkersuisut aalajangersaasinnaapput, tassunga ilanngullugu kajumissusillit pillugit nalunaarsuiffimmik pilersitsineq pillugu.

§ 10. Timersornikkut timigissarnikkullu neqeroorutit assigiinngisitaartut innuttaasunit tamanit atorneqarsinnaanerinut, neqeroorutigineqarsinnaanerinut ingerlanneqarsinnaanerinullu Naalakkersuisut pingarnertigut akisussaapput.

Imm. 2. Timersornerup timigissarnerullu ernumananngitsunera isumannaatsuuneralu pillugit maleruagassat, tak. § 3, aamma timersornerup timigissarnerullu minguitsuuneri pillugit maleruagassat, tak. §§ 4-5, eqqortinneqarnissaat pillugu Naalakkersuisut aamma akisussaapput.

§ 11. Kalaallit Nunaanni Timersoqatigii Kattuffiata suliaqarneranut aningaasanut inatsimmi ukiumoortumik tapiissuteqarnikkut Naalakkersuisut aningaasaliissuteqarput.

Imm. 2. Tapiissutit allaffissornermi aningaasartuutinut, sulisut, aqutsisut sungiusaasullu ilinniartitaanerannut, immikkut kattuffinnut peqatigiiffinnullu ilaasortaasunut ingerlatitseqqinnermut nunani tamalaani unammiuaarnerni aamma nunani tamalaani timersornikkut suleqatigiinnermi peqataanermut tunngaviusumik tapiissutaapput.

Imm. 3. Tapiissutit ilai siunertanut aalajangersimasunut atorneqartussatut aalajangerneqarsinnaapput.

Imm. 4. Tapiissutit piumasaqaatinik erseqqinnerusumik aalajangersarneqartunik atugassaqartitsiinnaapput.

Imm. 5. Naalakkersuisut Kalaallit Nunaanni Timersoqatigiit Kattuffiannik angusaqarnissamut ukiunut sisamanut isumaqatigiissuteqassapput, tassani peqataasut sammisassanut, tassunga ilanngullugu angusassatut piumasaqaatinut, nalunaarusiornissamut naatsorsuusiornissamullu piumasaqaatinut naatsorsuutigisaat aalajangersarneqassapput. Isumaqatigiissut tunngaviusumik pissutsinut atuuttunut tunngatillugu ukiukkaartumik aaqqinnejartassaaq, tassunga ilanngullugit aningaasaliissutit, aamma pisariaqartitsinerit nutaat.

§ 12. Naalakkersuisut Elite Sport Greenlandip ingerlataqarnerannut aningaasanut inatsimmi ukiumoortumik tapiissutinik aningaasaliisarpuit.

Imm. 2. Tapiissutit allaffissornikkut aningaasartuutit akilerneqarnerinut aamma Elite Sport Greenlandip suliaqarnerani aningaasartuutit akilerneqarnerinut tunngaviusumik tapiissutit tunniunneqartarput, tak. § 20.

Imm. 3. Tapiissutit ilai siunertanut aalajangersimasunut atorneqartussatut aalajangerneqarsinnaapput.

Imm. 4. Piumasaqaatit erseqqinnerusumik aalajangersarneqartut naammassineqarpata tapiissutit tunniunneqassapput.

Imm. 5. Naalakkersuisut Elite Sport Greenlandimik angusaqarnissamut ukiunut sisamanut isumaqatigiissuteqassapput, tassani peqataasut sammisassanut, tassunga ilanngullugu angusassatut piumasaqaatinut, nalunaarusiornissamut naatsorsuusiornissamullu piumasaqaatinut naatsorsuutigisaat aalajangersarneqassapput. Isumaqatigiissut tunngaviusumik pissutsinut atuuttunut tunngatillugu ukiukkaartumik aaqqinnejartassaaq, tassunga ilanngullugit aningaasaliissutit, aamma pisariaqartitsinerit nutaat.

§ 13. Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarneranni piumasarineqarpoq nakorsaatit pissassaatitut atorneqartartut pitsaaliornissaat akiuinerlu pillugu Nakorsaatit Pissassaatitut Atorneqartarnerinut Kalaallit Nunaanni Akiuisut maleruagassaannik aalajangersagaanik taakku malinnissasut eqqortitsissasullu, tak. § 21, imm. 2, nr. 5. Maleruagassanik taakkuninnga peqqarniitsumik utikattumillu unioqqutitsisarneq tapiissutinik pissarsisinnaanerup atorunnaarsinneranik aamma tapiissutit tunniunneqareersimasut utertillugit akilerneqarnissaannik piumasaqarnermik kinguneqassaaq.

Imm. 2. Kalaallit Nunaanni Timersoqatigiit Kattuffiannut aamma Elite Sport Greenlandimut Naalakkersuisut tapiissuteqarneranni piumasarineqarpoq timersorluni unamminernik allanngortiteriniarnerup pitsaaliornissaat akiuiniarnerlu pillugit Naalakkersuisut maleruagassiaannik malinnissasut, tak. § 5, imm. 2. Maleruagassanik taakkuninnga peqqarniitsumik utikattumillu unioqqutitsisarneq tapiissutinik pissarsisinnaanerup atorunnaarsinneranik aamma tapiissutit tunniunneqareersimasut utertillugit akilerneqarnissaannik piumasaqarnermik kinguneqassaaq.

§ 14. Timersortarfinnik sanaartornermut, iluarsaassinermut aaqqissuussinermullu Naalakkersuisut tapiissuteqarsinnaapput.

Imm. 2. Imm. 1 naapertorlugu timersortarfinnut aaqqissuussinernullu tapiissutit annerusumik nuna tamakkerlugu nunallu immikkoortuini timersortarfinnut tutsinneqassapput.

§ 15. Kommunimi timersornermut timigissarnermullu assigiinngitsunik neqerooruteqarnermut kommunalbestyrelsi pingaarnertigut akisussaavoq tamatumunngalu anguniakkanik tunngavinnillu aalajangersaassalluni.

Imm. 2. Kommunip illoqarfinita nunaqarfinitu timersornikkut timigissarnikkullu neqerooruteqarnissamut kommunalbestyrelsi ukiut tamaasa pilersaarusiussaaq. Pilersaarut kommunip nittartagaatigut tamanut saqqummiunneqassaaq.

Imm. 3. Naalakkersuisut tamanna pillugu kommunalbestyrelsimek isumasioqateqareerlutik pilersaarutip imm. 2-mi taaneqartup ilusaa imarisaalu pillugit maleruagassanik aalajangersaasinnaapput.

§ 16. Kommunalbestyrelsi timersortarfiit sanaartornerinut, iluarsartuunnerinut aaqqissuunnerinullu tapiissuteqarsinnaavoq.

Imm. 2. Imm. 1 naapertorlugu sanaartornermut, iluarsartuussinernut aaqqissuussinernullu tapiissutit sumiiffinni timersortarfinnut tapiissutaanerussapput.

Imm. 3. Kommunalbestyrelsi sumiiffimmi ininut silamilu timersorfinnut, timersornermi klubbinit pigineqartunut attartorneqartunulluunniit ingerlatsinermi aningaasartuutinut tapiissuteqarsinnaavoq.

Imm. 4. Kommunalbestyrelsi sumiiffimmi timersornikkut timigissarnikkullu sammisanut tapiissuteqarsinnaavoq, tassunga ilanngullugit sumiiffimmi timersoqatigiiffinnut aamma timersornermi klubbinut tapiissutit.

Imm. 5. Naalakkersuisut tamanna pillugu kommunalbestyrelsimek isumasioqateqareerlutik tapiissutit imm. 1-4-mi taaneqartut pillugit maleruagassanik aalajangersaasinnaapput.

§ 17. Timersortarfiit sanaartornerinut, iluarsaannerinut aaqqissuunnerinullu imaluunniit ininik silamilu timersortarfinnik, timersoqatigiiffinnit pigineqartunik attartorneqartunilluunniit ingerlatsinermi aningaasartuutinut kommunalbestyrelsi allalluunniit tapiissuteqarpata tapiissutigineqartut ilaannik Naalakkersuisut utertitsisinnaapput.

§ 18. Kommunit agguernerisa avataanni inatsit una malillugu suliassanik kommunalbestyrelsimit isumagisassanngortinneqarsimasunik Naalakkersuisut isumaginnituupput.

Imm. 2. Naalakkersuisut kommunimi ataatsimi arlalinniluunniit kommunalbestyrelsimek isumaqatigiissuteqarnermikkut, imm. 1 malillugu suliassat Naalakkersuisunit pisussaaffigineqartut isumagineqarnissaat tunriussinnaavaat.

Kapitali 4

Timersornermi kattuffiit

§ 19. Kalaallit Nunaanni Timersoqatigiit Kattuffiat tassaavoq Kalaallit Nunaanni timersornikkut timigissarnikkullu aaqqissugaasumik ingerlataqarnermut nuna tamakkerlugu pisortatigoortumik sinniisoq. Kattuffik pisortatigoortumik Kalaallit Nunaannut, tassunga ilanngullugu nunanut tamalaanut atatillugu sinniisuuvoq.

§ 20. Suliffeqarfik imminut pigisoq Elite Sport Greenland tassaavoq timersortartunik pikkorivissunik siuarsaanermi inerisaanermilu Kalaallit Nunaanni nuna tamakkerlugu sulisoq. Kattuffik Kalaallit Nunaanni Timersoqatigiit Kattuffiat peqatigalugu pisortatigoortumik Kalaallit Nunaannut, tassunga ilanngullugu nunanut tamalaanut atatillugu sinniisuuvoq.

Imm. 2. Elite Sport Greenland Kalaallit Nunaanni Timersoqatigiit Kattuffiat tassanilu immikkut kattuffiit, timersoqatigiiffit aamma timigissartarfait suleqatigalugit siunertaminik tapersersuissaqaq, ilaatigut ukununga taperseruinermitugut:

- 1) timersornermik piginnaasallit timersortartullu pikkorivissut sungiusarnerinut aamma unamminerni peqataanerinut, nunani tamalaani pikkorivissut timersornerini peqataanissamut periarfissamik siuarsaasoq,
- 2) nunani tamalaani timersornermi kingusinnerusukkut peqataanissaq siunertalarugu piginnaasalinnik inerisaaneq,
- 3) pikkorivisut pillugit sungiusaasut ilinniartitsinerillu,
- 4) Kalaallit Nunaanni timersornermi nakorsaanikkut immikkut ilisimasalinnik ineriartortitsineq, aamma
- 5) pikkorivissut soqutigisaannik isumaginninneq nunanilu tamalaani peqataanissaq siunertalarugu kalaallit nunaanni immikkut kattuffinnik aaqqissugaasumik ineriartortitsineq.

Imm. 3. Elite Sport Greenlandi Naalakkersuisut suleqatigalugit timersornikkut piginnaasaqartunik pikkorivissunillu tapersersuissaqaq timersornikkut piginnaasaqartoq pikkorivissorlu timersornermik ingerlataqarnermi saniatigut ilinniarnissamut periarfissaqartillugu.

§ 21. Timersornermi timigissarnermilu nakorsaatit pissassaatitut atorneqartarnerinut suliniutit siunnerfeqarnerannik, pitsaaninngortinnissaannik ataqtigisqarnissaanillu siunertaqartumik ataatsimiitaliamik attaviitsumik, Nakorsaatit Pissassaatitut Atorneqartarnerinut Kalaallit Nunaanni Akiuisunik, Naalakkersuisut pilersitsissapput, tassunga ilanngullugit pitsaaluiineq akiuinerlu.

Imm. 2. Nakorsaatit Pissassaatitut Atorneqartarnerinut Kalaallit Nunaanni Akiuisut siunertaminik malinninnerminni:

- 1) timersornermi timigissarnermilu nakorsaatit pissassaatitut atorneqartarnerinik pitsaaluiinermut akiuinermillu tunngasunik qaammarsaanermik ineriartortitsinermillu suliaqassapput,
- 2) Nakorsaatit Pissassaatitut Atorneqartarnerinut Kalaallit Nunaanni Akiuisut suliaqarfisa iluanni suliat pillugit pisortani oqartussanut siunnersuineq ikiuinerlu,
- 3) nakorsaatit pissassaatitut atorneqartarnerinik akiuineq pillugu nunani tamalaani suleqatigiinermut peqataassapput,

- 4) atortussiat timersornermi inerteqquaasut aamma periutsit inerteqquaasut atorneqarneri pissarsiarineqarsinnaanerisalu killeqartinnissai siunertaralugu aaqqiissapput,
- 5) nakorsaatit pissassaatitut atorneqartarnerinik akiuniarneq pitsaaliornerlu pillugit nunani tamalaani maleruagassanik aalajangersaassapput (nakorsaatit pissassaatitut atorneqartarnerinik akiuniarnermut maleruagassat),
- 6) nakorsaatit pissassaatitut atorneqartarnerinik nakkutilliissapput, tak. imm. 3, aamma
- 7) timersortartut aamma timigissartartut nakorsaatinik pissassaatinik atuisarnerannik akiuniarnermi maleruagassanik unioqquitsisunik ikorfartuisunut imaluunniit timersornermi timigissarnermilu nakorsaatit pissassaatitut atorneqarnerinut atatillugu allatigut unioqquitsisunut aaqqiissapput, tassunga ilanngullugit pineqaatissiissutissat pillugit aalajangiissapput.

Imm. 3. Nakorsaatit pissassaatitut atorneqartarnerinik akiuniarnermik nakkutilliinermik, tassunga ilanngullugu misiliinissamut pilersaarusiorneq, misiligtissanik, laboriatoriami misissuinernik katersineq passussinerlu, inernernik passussineq, tusarniaanernik aamma eqqartuussisunut annerusunut suliassanngortitsinermik isumaginnittunik nakorsaatit pissassaatitut atorneqartarnerinik akiuniarnermik nakkutilliisunik iluameersumik piginnaatitaasunik piukkunaaqeartunillu suleqatigiinneq Nakorsaatit Pissassaatitut Atorneqartarnerinut Kalaallit Nunaanni Akiuisut pilersitsissapput, taamaattorli tak. imm. 4.

Imm. 4. Imm. 3-mi taaneqartunut nakorsaatit pissassaatitut atorneqartarnerinik akiuniarnermik nakkutilliisunut periarfissatut allatut imaluunniit tapertaasussatut nakorsaatit pissassaatitut atorneqartarnerinik akiuniarnermik nakkutilliinerup tamakkiisumik ilaannakuusumilluunniit isumaginissaa pillugu nunanit allaneersunik nakorsaatit pissassaatitut atorneqartarnerinik akiuniartunik suleqateqarnissamik Nakorsaatit Pissassaatitut Atorneqartarnerinut Kalaallit Nunaanni Akiuisut isumaqtigiissuteqarsinnaapput.

§ 22. Nakorsaatit Pissassaatitut Atorneqartarnerinut Kalaallit Nunaanni Akiuisut tallimanik ilaasortaitaqarput. Ilaasortat imatut agguarneqarnissaannik inassuteqaat malillugu Naalakkersuisunit toqqagaapput:

- 1) ilaasortat marluk nalinginnaasumik timigissarneq pillugu ilisimasaqartut Kalaallit Nunaanni Timersoqatigii Kattuffiannit inassutigineqartut.
- 2) ilaasortat marluk timersortut pikkorivissut pillugit ilisimasaqartut Elite Sport Greenlandimit inassutigineqartut.
- 3) ilaasortaq ataaseq timersornermi nakorsaasersornermik pissutsinik ilisimasaqartoq Nunatsinni Nakorsaaneqarfimmit inassutigineqartoq.

Imm. 2. Ataatsimiitaliami ilaasortat, Kalaallit Nunaanni Timersoqatigii Kattuffiannit aamma Elite Sport Greenlandimit inassutigineqartut Kalaallit Nunaanni Timersoqatigii Kattuffianni aamma Elite Sport Greenlandimi siulersuisunut ilaasortaassanngillat. Ilaasortat aamma kattuffiit taakku arlaanni atorfeqartuussanngillat.

Imm. 3. Ataatsimiitaliami ilaasortat piffissamut ukiunut sisamanut toqqarneqassapput. Ataasiaannarluni toqqaaqqittooqarsinnaavoq. Ataatsimiitaliami piffissap suliffiusut naanissaa sioqqullugu ilaasortaq ataaseq tunuarpat piffissamut sinneruttumut toqqaasoqassaaq.

Imm. 4. Ataatsimiitaliaq nammineq siulittaasussamik aamma siulittaasup tullissaanik

inissititissaq aamma suleriaasisani nammineq aalajangersassallugu. Suleriaatsimi takuneqarsinnaassaaq taasinerit naligiinnerini siulittaasup taasinera aalajangiisuussasoq.

Imm. 5. Kalaallit Nunaanni Timersoqatigiit Kattuffiat ataatsimiititaliamit atorneqarsinnaasumik allattoqarnikkut ikiuissaaq.

§ 23. Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avatanni timersornermi timigissarnermilu nakorsaatnik pissassaatitut atuinerup pinngitsoortinnissaanik siunertaqluni Nakorsaatit Pissassaatitut Atorneqartarnerinut Kalaallit Nunaanni Akiuisut nakorsaatit pissassaatitut atorneqarnerinik pitsaaliornissaq akiuinissarlu pillugit ukuninnga suleqateqarnissamik isumaqatigiissuteqassaaq:

1) timigissartarfinnik ingerlataqarfinnillu allanik timersornikkut imaluunniit timigissarnikkut sammisaqartitsinermik neqerooruteqartut imaluunniit taakkununnga eqqaanartunik sammisaqartitsisut aamma Kalaallit Nunaanni Timersoqatigiit Kattuffianut ilaangitsut, aamma

2) Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avataanni timersornermi timigissarnermilu ingerlataqartut kattuffii.

Imm. 2. Timigissartarfiit il.il. Kalaallit Nunaanni Timersoqatigiit Kattuffianut ilaasut immikkut kattuffinnut, timersoqatigiiffinnut, timersornermi klubbinut aamma timigissartarfinnut atuuttut maleruagassat naapertorlugit nakorsaatit pissassaatitut atorneqartarnerinik akiuiniarluni nakkutilliinissaat imm. 1-mi taaneqartut suleqatigiinnissamut isumaqatigiissutit qulakkiissavaat.

Imm. 3. Suleqatigiinnissamut isumaqatigiissutit matumani pineqartut naapertorlugit suliaqarnermut Nakorsaatit Pissassaatitut Atorneqartarnerinut Kalaallit Nunaanni Akiuisut suleqateqarnissamik isumaqatigiissutit imm. 1-imi pineqartut akileeqqusinnaavaat.

Imm. 4. Imm. 1-mi taaneqartut suleqatigiinnissamut isumaqatigiissutit ilusilersornissaannut maleruagassanik Naalakkersuisut aalajangersaasinnaapput.

§ 24. Timigissartarfiit allallu ingerlataqarfiiit timersornermik imaluunniit timigissarluni sammisaqartitsinermik taakkununngaluunniit eqqaanartunik sammisaqartitsisut aamma Kalaallit Nunaanni Timersoqatigiit Kattuffianut ilaangitsut Nakorsaatit Pissassaatitut Atorneqartarnerinut Kalaallit Nunaanni Akiuisunik suleqatigiinnissamik isumaqatigiissuteqarsimanelutik atuisunut paasissutissiissutigissavaat, tak. § 23.

Taamaaqataanik Kalaallit Nunaanni Timersoqatigiit Kattuffianut ilaasut immikkut kattuffiit, timersoqatigiiffiit, timersornermi klubbit aamma timigissartarfiit avataanni timersornermi timigissarnermilu ingerlataqartut kattuffiinut atuuppoq.

Imm. 2. Paasissutissiineq allagarsiinikkut pissaaq, timigissartarfiup imaluunniit suliffeqarfipisaariaani imatut ikkunneqartussaq, sullitanit takuneqarsinnaalluni. Timigissartarfik imaluunnit suliffeqarfik nittartagaqarpat Nakorsaatit Pissassaatitut Atorneqartarnerinut Kalaallit Nunaanni Akiuisunik suleqatigiinnissamik isumaqatigiissut aamma tassani allanneqarsimassaaq.

Imm. 3. Paassisutissiinerup ilusilersorneqarnissaanut piumasaqaatinik erseqqinnerusunik Nakorsaatit Pisssassaatitut Atorneqartarnerinut Kalaallit Nunaanni Akiuisut aalajangersaasinnaapput.

§ 25. Inuit nakorsaatinik pissassaatitut atuisimasut pineqaatissinneqarsimasut pillugit paasisutissanik imaqtumik elektronikkikkut nalunaarsuiffimmik Nakorsaatit Pisssassaatitut Atorneqartarnerinut Kalaallit Nunaanni Akiuisut ingerlataqassapput.

Imm. 2. Nakorsaatit Pisssassaatitut Atorneqartarnerinut Kalaallit Nunaanni Akiuisut nalunaarsuiffik aqqutigalugu inuit kikkut nakorsaatinik pissassaatitut atorneqartartunik atuisimasut pineqaatissinneqarsimasut pillugit paasisutissanik Kalaallit Nunaanni Timersoqatigiit Kattuffiannut aamma kattuffimmut atasunut immikkut kattuffinnut timersoqatigiiffinnullu, Elite Sport Greenlandimut aamma peqataasunut nakorsaatit pissassaatitut atorneqartarnerinik pitsaliuinissaq akiornissarlu pillugu Nakorsaatit Pisssassaatitut Atorneqartarnerinut Kalaallit Nunaanni Akiuisunik suleqatigiinnissamut § 23 naapertorlugu isumaqatigiissuteqartunut paasisutissanik pisariaqartinneqartunik ingerlatitseqqissinnaavoq. Paasisutissat taamaallaat nakorsaatinik pissassaatitut atorneqartartunik atuisimasutut pineqaatissinneqarnerup atorunnaarnissaa pillugu ulloq pillugu paasisutissaapput ingerlateqqinnejqarsinnaasut. Paasisutissat nakorsaatinik pissassaatitut atorneqartartunik atuisimasutut pineqaatissinneqartup atortinnejqarneranut taamaallaat atorneqassapput.

Imm. 3. Peqataasut, nalunaarsukkat aqqutigalugit imm. 2-mi taaneqartunut paasisutissanut isersinnaasut paasisutissat pineqartut eqqarsaatigalugit nipangiussisussaatitaapput.

Imm. 4. Nalunaarsuiffimmik ingerlatsineq, tassungalu nalunaaruteqartarneq pillugu aamma taassuma aserfallatsaaliorneqarnissaa pillugu maleruagassanik erseqqinnerusunik Naalakkersuisut aalajangersaassapput.

§ 26. Nakorsaatit pissassaatitut atorneqartarnerinik akiuniarnermi maleruagassanik unioqqutitsinermut tunngasunik Nakorsaatit Pisssassaatitut Atorneqartarnerinut Kalaallit Nunaanni Akiuisut aalajangiinerinut naammagittaalliuutinik suliarinnittussamik naammagittaalliorfimmik, "Kalaallit Nunaanni Nakorsaatit Pisssassaatitut Atorneqartarnerinut Akiuniarnermut Ataatsimiititaliamik" Naalakkersuisut pilersitsissapput.

Imm. 2. Kalaallit Nunaanni Nakorsaatit Pisssassaatitut Atorneqartarnerinut Akiuniarnermut Ataatsimiititaliaq pingasunik ilaasortaataqarpoq. Ilaasortat imatut agguarneqarnissaannik inassuteqaat malillugu Naalakkersuisunit toqqagaapput:

- 1) ilaasortaq ataaseq inatsisilerinermik ilinniagalittut soraarummeersimasoq, Nunatta Eqqartuussisuanit inassutigineqartoq.
- 2) ilaasortaq ataaseq timersornermi nakorsaatinut tunngasunik ilisimasaqartoq, Nunatsinni Nakorsaaneqarfimmit inassutigineqartoq.
- 3) ilaasortaq ataaseq timersorneq pillugu ilisimasaqartoq, Kalaallit Nunaanni Timersoqatigiit Kattuffiannit aamma Elite Sport Greenlandimit peqatigiillutik inassutigineqartoq.

Imm. 3. Ataatsimiititaliami ilaasortat, Kalaallit Nunaanni Timersoqatigiit Kattuffiannit aamma Elite Sport Greenlandimit inassutigineqartut Kalaallit Nunaanni Timersoqatigiit

Kattuffianni aamma Elite Sport Greenlandimi siulersuisunut ilaasortaassanngillat. Ilaasortat aamma kattuffiit taakku arlaanni atorfeqartuussanngillat.

Imm. 4. Ataatsimiititalami ilaasortat piffissamut ukiunut sisamanut toqqarneqassapput. Ataasiaannarluni toqqaaqqittooqarsinnaavoq. Ataatsimiititalami piffissap suliffiusut naanissaa sioqqullugu ilaasortaq ataaseq tunuarpat piffissamut sinneruttumut toqqaasoqassaaq.

Imm. 5. Ilaasortaq Nunatta Eqqartuussisuanit inassuteqartoqarneranit toqqarneqartoq ataatsimiititalami siulittaasuussaaq.

Imm. 6. Ataatsimiititaliaq nammineq suleriaasissamik aalajangersaassaaq. Suleriaasissamili takuneqarsinnaassaaq taasinerit naliginnerini siulittaasup taasinera aalajangiisuussasoq.

Imm. 7. Naalakkersuisut ataatsimiititaliamit atorneqarsinnaasumik allattoqarnikkut ikiuissapput.

Kapitali 5

Aningaasalersuineq allaffissornerlu

§ 27. Timersornermut timigissarnermullu aningaasartuutit tamarmik kommunimit akilerneqassapput, aningaasartuutit tamakkiisumik ilaannakuusumilluunniit Namminersorlutik Oqartussanit allaniilluunniit akilerneqartussaasut pillugit erseqqissumik inatsisitigut tunngavissaqanngippat. Namminersorlutik Oqartussat aamma kommunit inatsisitigut pisussaaffiusup suliassat akilerneqarlutik isumagineqarnissaat pillugu isumaqtigiiissuteqassapput.

Imm. 2. Kommunit agguarnerisa avataanni immikkoortuni aningaasartuutit, tak. imm. 1, Naalakkersuisunit akilerneqassapput.

Kapitali 6

Naatsorsuutit kukkunersiuinerlu

§ 28. Kalaallit Nunaanni Timersoqatigiit Kattuffiat, Elite Sport Greenland aamma Nakorsaatit Pissassaatitut Atorneqartarnerinut Kalaallit Nunaanni Akiuisut tamatumunnga piffissaliussatut Naalakkersuisut aalajangersagaat nallertinnagu ukiumut qaangiuttumut naatsorsuusiorfiusumut naatsorsuutiminnik kukkunersiorneqarsimasunik allatigullu naatsorsuutinut atortunik Naalakkersuisunut nassiussissapput.

Imm. 2. Kalaallit Nunaanni Timersoqatigiit Kattuffiata nammineq naatsorsuutaanut ilanngulligit immikkut kattuffiit, timersoqatigiiffiit, timigissartarfiit il.il. kattuffimmut ilaasunut naatsorsuutit kukkunersiorneqarsimasut nassutiessavai.

Imm. 3. Naatsorsuusianik saqqummiussineq Namminersorlutik Oqartussat naatsorsuuserivia pillugu maleruagassani tamanna pillugu maleruagassat naapertorlugit pissaaq. Naatsorsuutit avataanit kukkunersiuisumit naalagaaffimmit akuerisaasumit imaluunniit nalunaarsugaasumit kukkunersiorneqassapput.

§ 29. § 28, imm. 1-imi taaneqartunmit allaanerusunit Naalakkersuisunit tapiissutinik pissarsisartut allat tamatumunnga noqqaasoqarneratigut tapiissutit siunertamut aningaasaliiffigineqartumut atorneqarsimaneri pillugit upternarsaassapput.

§ 30. Tapiissutisisimasoq eqqunngitsunik paasissutissiisimappat, tapiissutinissamut piumasaqaatit naammassineqanngippata imaluunniit tapiissutit aningaasaliissutigineqartussanut siunertanut allanut atorneqarsimappata tapiissutit aningaasaliissutigineqarsimasut tamakkiisumik ilaannakuusumilluunniit utertillugit akilerneqarnissaat piumasarineqarsinnaavoq.

§ 31. Tapiissutit atorneqarsimanerinut akuersineq aamma upternarsaatit pillugit, naatsorsuutit kukkunersiuinerlu pillugit aamma tapiissutit utertillugit akilerneqarnissaat pillugu maleruagassanik Naalakkersuisut aalajangersaasinnaapput.

Kapitali 7 *Naammagittaalliuuteqarneq*

§ 32. Inatsisit una naapertorlugu Naalakkersuisut aamma kommunalbestyrelsip aalajangiineri allaffissornikkut oqartussanut allanut suliassanngortinnejarsinnaanngillat.

Imm. 2. Naalakkersuisut isumaqtigiissuteqarfigalugit kommunalbestyrelsintut tunniunnejarsimasunut suliassanut tunngasuni kommunalbestyrelsimit aalajangiinerit aalajangiinerup nalunaarutigineqarneraniit sapaatit akunneri sisamat qaangiutsinnagit Naalakkersuisunut suliassanngortinnejarsinnaapput.

Kapitali 8 *Misileraalluni aaqqissuussinerit*

§ 33. Inatsisip iluani misileraalluni ingerlataqarnermik siuarsaanissamut tamanna pisariaqartutut isigineqarsinnaappat utaqqiisaasumik aaqqissuussinertut immikkut pisoqartillugu Naalakkersuisut inatsimmi aalajangersakkanik saneqqussisinnaapput.

Imm. 2. Misileraalluni ingerlataqarnermut Naalakkersuisut tapiissuteqarsinnaapput, tak. imm. 1.

Kapitali 9 *Nakkutilliineq pineqaatisssiinnerlu*

§ 34. Inatsisip eqqortinnejarneranik pingaarnertigut Naalakkersuisut nakkutilliisuupput.

Imm. 2. Inatsit malillugu suliassamisut isigineqarsinnaasutut pisariaqartunik paasissutissanik Naalakkersuisut piumasaqarsinnaapput.

§ 35. § 6, imm. 1, § 24, imm. 1-imik aamma 2-mik aamma § 25, imm. 3-mik unioqqutitsinernut akiliisitsisoqarsinnaavoq.

Imm. 2. § 6, imm. 1-imik unioqqutitsinermut Kalaallit Nunaanni pinerluttulerinermut inatsimmi maleruagassat malillugit allanik pineqaatissiilluni pillasoqarsinnaavoq, pisoq immikkut ingassattumik pissuseqarpat, pingaartumik ingerlanneqarsimanera pissutigalugu, imaluunniit suliaq arlallit peqatigiinnerisigut ingerlanneqarsimappat, imaluunniit pineqartup tunissutip imaluunniit iluaqusiinerup annertussusiata malitsigisaanik.

Imm. 3. Inatsit imaluunniit inatsit naapertorlugu najoqqutassaliat akiliisitsinissamut tunngavissaqartitsippata Kalaallit Nunaanni pinerluttulerinermi inatsimmi maleruagassat malillugit inatsisitigut pisinnaatitaasoq pisussaatitaasorlu akiliisinneqarsinnaavoq.

Imm. 4. Inatsit manna naapertorlugu najoqqutassaliani najoqqutassanik unioqqutitsinerit pillugit akiliisitsisoqarluni pineqaatissiinernik aalajangersaasoqarsinnaavoq.

Imm. 5. Pillaammik akiliutit, inatsit manna imaluunniit peqqussutit inatsit naapertorlugu aalajangersarneqartut malillugit pineqaatissiissutigineqartut, Nunap Karsianut tutsinneqartassapput.

Kapitali 10 *Atuutilersitsineq*

§ 36. Inatsit ulloq 1. januar 2017 atuutsilissaq.

Imm. 2. Inatsisip atulersinneqarnerata peqatigisaanik timersorneq timigissarnerlu eqqarsaatigalugu kulturikkut ingerlatsineq sunngiffimmilu sammisassaqartitsineq pillugit Inatsisartut peqqussutaata nr. 10-p, 21. maj 2002-meersumi maleruagassat atorunnaarput.

Imm. 3. Kulturikkut ingerlatsineq sunngiffimmilu sammisassaqartitsineq pillugit Inatsisartut peqqussutaata nr. 10-p, 21. maj 2002-meersumi naapertorlugu maleruagassat aalajangersarneqarsimasut imaluunniit ingerlatiinnarneqartut atuutiinnassapput, taakku atorunnaarsinneqarnissaasa imaluunniit inatsit manna imaluunniit inatsisit allat naapertorlugit maleruagassanik aalajangersarneqartunik taarserneqarnissaasa tungaannut.

Namminersorlutik Oqartussat, den 6. juni 2016



Kim Kielsen